

gestallt. Do ass et effektiv esou, datt dat och d'Entscheidung vum Riichter ass, ob e wëllt d'Auditioun um Uerschterhaff maachen oder net.

Et ass esou, datt et wichteg ass, datt de Riichter d'Persoun en face huet fir den Interrogatoire. Ech mengen, do spillt d'Kierpersprooch och eng weesentlech Roll. Et ass awer esou, datt een och muss bedenken, datt wann een decidéiert, den Interrogatoire um Uerschterhaff ze maachen, datt dat ganz oft och nach den Displacement voraussetzt vun engem Affekt a vun engem Interpret. Woubäi dat och erëm eng Konsequenz huet op aner Affären, déi dann dee Moment leibleiwen, déi dann um Geriicht fixéiert sinn a mussen eventuell refixéiert ginn, soudatt do den Untersuchungsrichter natierlech déi Entscheidung och en fonction vu verschiddene Consideratiounen hält.

Ech soen Iech Merci an ech gi weider un den Inneminister.

M. Claude Wiseler, Président | Merci, Madamm Justizminister. Dann huet den Här Inneminister d'Wuert. Deen huet nach ronn 5 Minuten. Merci.

M. Léon Gloden, Ministre des Affaires intérieures | Merci, Här President. Merci och fir déi Fro.

Ech wëll fir d'éischt emol dem Här Deputéierte Biancalana rappéléieren, vu wou mer kommen. Et ass eng Réforme pénitentiaire 2018 ginn. Well virun där Reform huet d'Police just d'Detenuen an déi klasséiert Condamnéiert gefouert. An dunn, ab dem Summer 2019, also ënnert der viregter Regierung, ass alles vun der Police iwwerholl ginn. An ech mengen, déi Zäit war nach en LSAP-Politiker Policeminister.

Vläicht e puer Chifferen.

Wéi gesäit d'Charge de travail fir den UGAO aus mat de Gefaangenentransporter? Mir hu fir déi lescht zielef Méint insgesamt 51.312 Stonne mam Gefaangenentransport verbruecht. Dat ass eng Augmentatioun vun 8 % par rapport zu 2023. Dovunner sinn 9.495 Stonnen aleng fir d'Virféierung beim Untersuchungsrichter, 5.248 Stonne fir d'Setzungsdeingschter an d'Prononcé vum Jugementer, 640 Stonne fir d'Chambre du conseil, an 340 Stonne si vun Abrëll 2023 bis Mäerz 2024 gemaach gi fir d'Consultatiounen vun den Dossieren.

Opgrond vun de Remarque vun der Madamm Negrini hat ech déi och invitéiert bei mech an de Ministère. Dat war eng ganz konstruktiv Sëtzung. Si huet och nach eng Kéier confirméiert, datt de Gefaangenentransport gutt funktionéiert, well d'Polizisten an d'Polizistinnen dat gutt maachen. A mir hunn och iwwer potenziell Méiglechkeete geschwat, wéi een de Gefaangenentransport kann entlaaschten.

Dat war och Sujet an deene verschiddene Comités de concertation régionale a besonnesch am Süden, an Ärem Bezierk, wou och e Representant vum Parquet do war, fir ze kucken, datt an Zukunft keng Transporter misste gemaach ginn, wa Chambre-de-conseil-Sitzung sinn oder bei Prononcéen.

Dat géif eis, der Police, natierlech hëllefen, well do kéint ee schonn tëscht 25 % a 40 % vun de Gefaangenentransporter aspueren. Si sinn amgaang, do ze kucken, dat vläicht bis Enn 2025 kënnen en place ze setzen. Dat ënnerstëtzt mir natierlech, well et och dann d'UGAO entlaascht.

Doriwwer eraus, mengen ech, kann ech mech nëmmen deem uschleissen, wat d'Justizministesch gesot huet. A mir hunn och wëlles, eng Kéier an Däitschland dee System kucken ze goen. Do gëtt et jo eng speziell Behörde, wéi se an Däitschland soen, déi dee ganzen Encadrement vun der Justiz, vum Fonctionnement vun der Justiz assuréiert. An dat wëlle mer och eng Kéier kucke goen.

Ech hat dat och kuerz ugeschwat, wéi ech elo zu Saarbrécke beim Kolleeg Inneminister do war. An da muss een ..., wéi gesot, d'Justizministesch huet jo och gesot, datt et a Frankräich och laang gedauert huet, fir dee Switch ze maachen. An dat sinn alles Consideratiounen, déi an eis Iwwerleeunge mat afléissen.

Merci.

M. Claude Wiseler, Président | Merci, Här Inneminister.

Här Biancalana, hutt Dir nach eng Zousatzfro? Dat ass net de Fall. Dann ass och dese Punkt vun eisem Ordre du jour ofgeschloss.

17. 7961 – Projet de loi modifiant :

1° la loi modifiée du 19 décembre 2002 concernant le registre de commerce et des sociétés ainsi que la comptabilité et les comptes annuels des entreprises ;

2° la loi modifiée du 13 janvier 2019 instituant un Registre des bénéficiaires effectifs

An da géife mer zum Projet de loi 7961 kommen iwwer eng Rei Ofännerunge vu legalen Dispositiounen am Registre de commerce et des sociétés, dem RCS, an am Registre des bénéficiaires effectifs, dem RBE. D'Riedezäit ass nom Basismodell festgeluecht: 10 Minute fir de Rapporteur, 5 Minute fir all Fraktioun a Sensibilitéit, 10 Minute fir d'Regierung. Et hu sech schonn ageschriwwen niewent dem Här Mosar: den Här Arendt, d'Madamm Braz, den Här Hardy, d'Madamm Tanson an den Här Clement. An d'Wuert huet elo de Rapporteur vum Projet de loi, den honnabellen Här Laurent Mosar. Här Mosar, Dir hutt d'Wuert.

Rapport de la Commission de la Justice

M. Laurent Mosar (CSV), rapporteur | Jo, merci, Här President. Léif Kolleeginnen a Kolleegen, Madamm Justizministesch, de Projet de loi, deen ech elo de Pleséier hunn, Iech virstellen, betrëfft a sech d'Moderniséierung vun zwou zentrale Strukturen: op där enger Säit de Registre de commerce et des sociétés, RCS an ofgekierzter Versioun, an op där anerer Säit de Registre des bénéficiaires effectifs, den RBE. Dese Projet ass dann och e wichtige Mosaiksteen, wat eis wirtschaftlech Zukunft betrëfft, awer och, fir d'Situatioun an d'Positioun vun eisem Land als international Finanzplaz, notament um Niveau vu senger Reputatioun, ze stärken.

D'Zil vum Projet de loi ass kloer: Mir wëllen d'Qualitéit an d'Genaukegkeet vun den Informatiounen, bei an deenen zwee Regësteren agedro sinn, verbessern. Et geet drëm, datt déi Donnéeën ëmmer aktuell, korrekt a kohärent sinn, esou wéi et sech och fir eng modern Wirtschaft an e modern Justizwiese passt.

D'Realitéit ass Follgend: Trotz dem Fortschritt duerch d'Automatiséierung vum RCS bleiwen nach ëmmer Lacunen, an och wann et méi einfach ginn ass, op Informatiounen vun deem Regëster zougéifen, ass dach d'Actualitéit vun den Donnéeën net ëmmer ganz zefriddestellend. Et gëtt nach net genuch juristesche Mëttelen, fir déi gespächert Donnéeën ze iwwerpräiwen an, wann néideg, unzepassen.

Dofir proposéiert dese Gesetzesprojet eng Rei konkret Upassungen.

Fir d'éischt eng verstärkt Kontroll an Automatiséierung. D'Informatiounen sollen am Registre de commerce mat aneren nationale Regëstere wéi zum Beispill dem Regëster vun de Stroossen an de Lokalitéiten ofgeglaach ginn. Wann zum Beispill eng Adress geännert gëtt, soll dat automatesch och am RCS iwwerholl ginn.

Wat de Suivi betrëfft, do soll de Gestionnaire vum RCS nei Mëttele kréien, fir och d'Entreprise ëmmer erëm un hir gesetzlech Obligatiounen ze erënneren. D'Notifikatiounen an déi systematesch Relancé sollen dozou féieren, datt déi betreffen Entrepreneuren hir Donnéeën ëmmer ganz aktuell halen.

Da ginn eng Rei administrativ Moossnamen a Sanktiounen virgesinn. Wann eng Entreprise an Zukunft hir Obligatiounen, trotz Erënnerungen a Rappellen, net erfëllt, kritt den RCS-Gestionnaire d'Méiglechkeet, administrativ Moossnamen ze ergreifen, an hie kann dat och beim Parquet mellen.

Dës Upassungen gëllen net nëmme fir de Registre de commerce, mee och fir de Registre des bénéficiaires effectifs. De Registre des bénéficiaires effectifs spillt, wéi Der dat alleguer wësst, eng zentral Roll och an der Lutte géint d'Geldwäsch an d'Finanzéierung vum Terrorismus. Dofir ass et och noutwendeg, datt d'Informatiounen an deem Regëster ëmmer korrekt, exakt a kohärent sinn.

Déi grouss Linnen, wat elo d'Ännerunge fir den RBE betrëfft, si Follgend:

Hei soll a sech eng besser Interconnectivitéit zwëschen dem RCS an dem RBE geschaaft ginn. Dat bedeit, datt d'Donnéeën tëscht dese béide Regëstere méi einfach a méi séier kënnen ausgetosch ginn.

D'Deklaratiounsprozesser solle fir Entrepreneuren an Organisatiounen ewéi d'ASBL méi einfach ginn. Dat hei ass also e ganz konkrete Schrëtt a Richtung Simplification administrative.

Déi technesch Moderniséierung gëtt duerch eng nei sécher elektronesch Plattform erméiglecht. An des Plattform erlaabt dann och den automatiséierten Datenaustausch an erméiglecht den Autoritéiten e besseren Zougang zu den Donnéeën.

Här President, komme mir zu den Avisen. De Staatsrot hat a sengem Avis eng Rei vun Opposition-formellen an huet awer och direkt eng Rei vu Verbesserungsvorschläge gemaach. Ech ginn elo net am Detail dodrop an. Dat kënnt Der alles a mengem schrëftleche Rapport noliesen.

Zur Prozedur wär nach Follgendes ze soen: Dese Gesetzesprojet ass de 27. Januar 2022 deposéiert ginn. Et koumen am Ganze 17 Avisen eran, déi ech, an dat verstitt Der, aus zäitleche Grënn net alleguerten hei kann developpéieren. Erlaabt mer awer trotzdem, bei Geleeënheet vum Vott vun deem Projet, all deenen Associatiounen, déi heizou en Avis gemaach hunn, e grouss Merci ze soen a fir den Detail op mäi schrëftleche Rapport ze verweisen.

Ech erlabe mer awer, hei trotzdem op verschiddenen Avisen ganz kuerz anzugeen. Sou huet de Staatsrot de 7. Februar 2023 säin Avis ofginn an huet duerno nach véier Avis-complémentaire zum Gesetzesprojet publizéiert.

D'Chambre de Commerce huet hiren éischten Avis de 4. Mee 2022 publizéiert an duerno och nach zwee zousätzlech Avisen presentéiert.

Genau wéi de Staatsrot an d'Chambre de Commerce, huet och d'Commission nationale pour la protection des données hiren éischten Avis den 31. Mäerz 2023 eraginn.

Ech gouf duerno an der Sitzung vun der Justizkommission vum 28. Mäerz vun deem Joer zum Rapporteur ernannt.

D'Justizkommission huet iwwer dräi Serien Amendements parlementaires diskutéiert an déi dann och an der Kommission ugehall. Dës Amendementer goufen dann och alleguerte vum Staatsrot aviséiert.

An de Staatsrot huet dann zu gudder Lescht säi leschten Avis complémentaire den 10. Dezember vun dem Joer eraginn.

Dësen Avis gouf den 12. Dezember an der zoustänneger Justizkommissioun analyséiert an de Rapport vun deemem Projet gouf dann och an där selwechter Kommissioun ugeholl.

Här President, domat schléissen ech mäin Exposé als Rapporteur. An erlaabt mer dann nach ganz kuerz, schnell déi Kap vun mandatéierter Sprächer vun der CSV-Fraktioun unzedeien.

Discussion générale

D'CSV-Fraktioun begreiss natierlech, datt dese Gesetzesprojet no ganz laanger Onsécherheet um Terrain dann endlech de Moien hei zur Ofstëmmung kënn. Ech muss soen, ech hu selten och a menger Karriär als Rapporteur vu ganz ville Projeten e Projet gesinn, deen esou oft zwëschen der Justizkommissioun an dem Staatsrot hin- an hi ergangen ass.

Mir hate souguer eng Kéier eng Sitzung als Chamberskommissioun am Staatsrot, fir ze kucken, ob mer hei net méi schnell géife virukommen. Ech muss och soen, et war äusserst komplizéiert, well et och zum Deel en extreem technesch Projet ass an et ware wierklech ganz vill Explikatiounen néideg zwëschen der Justizkommissioun an och der Regierung an dem Staatsrot, fir datt mer da schlussendlech zu engem positiven Ofschluss komm sinn.

Ech wëll och nach eng Kéier widerhuelen, wéi wichteg datt et besonnesch an den haitegen Zäiten ass, fir kloer Richtlinnen ze hunn, fir den Émgang mat Donnéeën vun Entrepreneuren, awer och haaptsächlech de Wee fir den Zougrëff op dese Donnéeën méiglechst einfach ze maachen, natierlech ëmmer ënnert dem Respekt vun deene Konditiounen, déi och an deene verschiddene Gesetzter elo festgeschriwwen sinn.

Ech géif awer besonnesch nach eng Kéier hei ervirhiewen, datt mer mat deemem Projet wierklech en éischte wichtige Schrëtt a méi eng grouss Simplification administrative maachen, notament duerch eng besser Kooperatioun zwëschen deenen zwee Registeren.

Als Konkursioun wäerte mer mat deemem Projet e wichtige Schrëtt fir méi Transparenz, Genaugkeet an Effizienz an eisem Registerstystem haut maachen. Et wäert Lëtzebuerg och säi Ruff als transparent, professionell a seriö Finanzplaz stäerken an och eis administrativ Effizienz fir Entrepreneuren an Organisatiounen, wéi d'ASBLen, weesentlech verbesseren. An duerfir ginn ech och heimadder den Accord vun menger Fraktioun zu deemem Gesetzesprojet.

Ech soen Iech Merci fir Är Opmierksamkeet.

Plusieurs voix | Très bien!

M. Claude Wiseler, Président | Merci, Här Mosar, fir Äre schrëftlechen a fir Äre mündleche Rapport. An den éischten ageschriwwene Riedner ass den Här Guy Arendt. Här Arendt.

M. Guy Arendt (DP) | Jo, merci, Här President. Eigentlech ass alles gesot vum Här Mosar. Well mir begreissen och als DP déi Transparenz, déi Simplification administrative, déi do ageféiert gëtt. Et geet net, dass mer Regëstere hunn, déi net fiabel sinn. Mir mussen fiabel Regëstere hu mat Donnéeën, op déi ee sech och ka verloossen.

Dofir ass et och wichteg, dass et Kontrolle gëtt an dass eeben de Gestionnaire a verschiddene Fäll – wann een de Recommandatiounen, fir à jour ze setzen, net nokënn – och administrativ Mesure kann huelen, fir eeben d'Leit ze forcéieren, sech à jour ze setzen.

Mir wëssen och, dass déi zwee Regëstere ënner anerem och fiabel mussen si wéinst dem Blanchiment vum Geld a géint den Terrorismus. Méi ass net ze soen an ech kann nëmmen den Accord vun der DP-Fraktioun heizu ginn.

Plusieurs voix | Très bien!

M. Claude Wiseler, Président | Merci, Här Arendt. Dann huet d'Madamm Liz Braz d'Wuert.

Mme Liz Braz (LSAP) | Jo, diesen Text balancéiert effektiv gutt d'Transparenz, déi Lëtzebuerg sech als Land muss ginn, mee awer och de Respekt virun der Europäescher Mënscherechtskonventioun an dem RGPD. Dofir si mer haut och frou, déi gesetzlech Upassungen hei kënnen ze stëmmen, déi de Kader an d'Reegele fir den Accès méi kloer definéieren, an domat och d'Qualitéit vun den Informatiounen duerch déi verschidde Mechanismen a Mesuren, déi virgesi sinn, ze verbesseren.

Esou e proaktive Regëster, dat ass grad fir e Land wéi Lëtzebuerg mat esou enger grousser Finanzplaz ëmsou méi vu Virdeel. An dofir hoffe mer och, dass des Outil sech herno an der Praxis als positiv wäerten erweisen.

Mir begreissen och, dass dem Conseil de presse seng Fuerderungen zréckbehale gi sinn, fir d'Journalisten an deemem Text als „personnes qui démontrent un intérêt légitime dans le cadre de la lutte contre le blanchiment“ ze definéieren an esou hiren Accès weider ze garantéieren. Si spillen och hei an der Lutte eng wichteg Roll. An et ass wichteg, dass mer hir Rechter stäerken an net schwächen.

An dofir sinn ech frou, eisen Accord fir dese Projet kënnen ze ginn.

M. Claude Wiseler, Président | Merci, Madamm Braz. Den Här Dan Hardy.

M. Dan Hardy (ADR) | Merci, Här President. Dir Dammen an dir Hären, och mir stëmmen dese Gesetzesprojet mat. Mir begreissen, datt diesen Text elo dozou bäidréit, datt endlech nach méi prezis Informatiounen an den Handelsregëstere kommen an et de jeeeweilige Gestionnairen esou erlaben, e bessere Suivi ze maachen.

Datt duerch dëst Gesetz den Handelsregëster mam RBE, dem Registre des bénéficiaires effectifs, interconnectéiert gëtt, stellt ee grouss Virdeel duer a verhënnert dee sougenannten „double Emploi“.

Da begreisse mir och explizit, datt am Fall vun engem Verdacht vu Wäisswäsche vu Suen oder enger méiglecher Finanzéierung vun terroristeschen Aktivitéiten méi séier reagéiert ka ginn, zum Beispill, wann eng SA, eng Société anonyme also, hire Joresbilan net deposéiert huet oder wichteg Donnéeën vun hire respektive Konten net aktualiséiert huet.

Ech soen Iech Merci.

M. Claude Wiseler, Président | Merci, Här Hardy. D'Madamm Sam Tanson.

Mme Sam Tanson (déi gréng) | Jo, merci, Här President. Et ass schonn heiansdo e bëssen d'Ironie vun der Geschicht, Här Mosar, wann ech mech un déi ganz houléis Diskussiounen erënneren, déi mer zu deemem Gesetzestext, deen ech deposéiert hat, an der Kommissioun haten, wann ech elo hei Är luewend Wieder héieren, déi Der als Rapporteur vun deemem Text dofir hutt, an Iech souguer nach e bëssen op d'Schëller klappt, dass Der elo hei eng Simplification administrative géift maachen!

Ech wollt vläicht nach eng Kéier kuerz drop zréckkommen, firwat dass dat heite sou wichteg ass. Mir hunn eng grouss Finanzplaz. Dat ass de Moie scho vill

ugeklongen. Et sinn oft Journalisten, déi Recherché maachen, déi kucken och, wéi pertinent verschidden Informatiounen sinn. A mir kréie souwuel vun der Press, déi eng ganz wichteg Roll huet an deem Beräich vun der Kontroll, wéi och vun internationalen Institutiounen, wéi zum Beispill engem GAFI, ëmmer erëm gesot, wéi wichteg et ass, net nëmmen, dass mer déi Date sammelen, mee dass se och richtig sinn.

An dofir war dat hei mer e ganz grouss Uleies, dass mer och dem Regëster déi néideg Moyene ginn, fir déi Donnéeën och ze kontrolléieren a fir deementsprechend Sanktiounen auszuschwätzen.

A firwat gouf et esou vill Aller-retouren? Dotëscht koom nach eng Jurisprudenz vum Europäesche Geriichtshaff am Joer 2022, wou d'Europäesch Direktiv invalidéiert ginn ass op deem Punkt, wou se jiddwerengem den Accès op den RBE erméiglecht huet. An do war et mer och deemools immens wichteg, dass mer deen Accès esou séier wéi méiglech erëm géife reegele fir eebe grad déi Leit, déi eng ausseruerdentlech Kontroll hei ausüben, an zwar eeben net just déi Professionell, mee och d'Journalisten. An och do hate mer ganz vill kritesch Diskussiounen, Här Mosar, an der Kommissioun.

An, wéi d'Madamm Braz et grad richtig gesot huet, et war immens wichteg fir ons, dass mer géifen de Journalisten hei nolauschten a kucken, dass mer eng Reegelung kréichen, mat deene se kënnen liewen. Ech hoffen, dass dat elo hei de Fall ass. An ech si wierklech frou, dass mer deen Text elo hei endlech zu engem Ofschluss kréien.

An ech ginn natierlech den Accord vun deene Gréngen.

Une voix | Très bien!

M. Claude Wiseler, Président | Merci, Madamm Tanson. Den Här Sven Clement.

M. Sven Clement (Piraten) | Merci, Här President. Et gouf elo schonn e puermol gesot: Deen heite Projet läit schonn eng Zäitchen um Instanzewee. Wann ee sech d'Nummer ukuckt – 7961 –, gëscht ass de 8469 deposéiert ginn! Also iwwer 500 Projekte méi spët, déi sinn elo schonn deposéiert, a mir stëmmen dann elo endlech deen heite Projet.

Et ass awer ganz gutt, datt mer en endlech stëmmen, well wie mol mam RBE ze dinn huet, ob dat an enger ASBL ass, ob dat an enger Firma ass, dee weess, datt dat an der aktueller Situatioun awer heiansdo ganz schwéierfällg ass, soudatt ech grouss Hoffnungen hunn, datt et mat deenen neien Zesummeleeungen, mat där neier Simplification administrative, wéi een dat esou schéin op Politikerlëtzebuergesch seet, dann awer wierklech zu enger Vereinfachung am Liewe vun deene Leit kënn, déi all Dag oder zumindest eemol d'Joer – well meeschtens ass et eemol d'Joer – mat deene Regëstere ze dinn hunn.

Deementsprechend kann ech och nëmme begreissen, datt d'Journalisten hei weiderhin hiren Zougang behalen an datt deen och elo kloer gereegelt ass, soudatt mer do keng Doutte méi kréien.

Dat gesot, kann ech nëmmen den Accord vun de Piraten fir dese Projet ginn. Merci.

M. Claude Wiseler, Président | Merci, Här Clement.

Elo ass keng weider Wuertmeldung do. Dann ass et un der Regierung. Madamm Justizministesch.

Prise de position du Gouvernement

Mme Elisabeth Margue, Ministre de la Justice | Merci, Här President. Ech géif ufänken an dem Rapport villmools Merci soe fir säin detailléierte Rapport.

Dat erlaabt mer, net méi misse vill op d'Detailer anzegoen. An da géif ech Iech all Merci soe fir déi ganz grouss Zoustëmmung fir dëse Rapport.

Ech wollt awer dräi kleng Punkte maachen. Ech wollt, éischters, awer nach eng Kéier op d'Wichtigkeet vun dësem Text insistéieren. Et ass wierklech e Change-ment de paradigme. Mir ginn dem LBR hei eng ganz aner Roll, fir eeben ze garantéieren, datt déi Don-néeën, déi um LBR zur Verfügung stinn, och fiabel sinn.

Dat ass ganz wichteg, dat ass schonn e puermol ugeklongen, natierlech fir d'Zivillgesellschaft, mee awer och fir déi wirtschaftlech Aktivitéit hei am Land.

Dann, en zweete Punkt ass deen, datt mer awer och eng Approche adoptéiert hunn, déi eng Sensibilisa-tion vun de Betriber virussetzt. Et geet par étapes. Als éischt kritt een eng E-Mail, wann eng Formalitéit net erfëllt ass, da gëtt et eng Warnung, an da gëtt um Site geschriwwen, datt eng Donnée feelt. An eréischt da kënnt déi Sanction administrative, kann déi geschwat ginn, soudatt mer do awer wierklech och probéieren, d'Betriber mat op de Wee ze huelen.

An dann, drëtters, ass et wichteg, datt mer eis mat deem heite Projet dann och conforméiere par rapport zu der Jurisprudenz vum Europäesche Gerichtshaff, wat den Accès op den RBE ubelaangt, an an deem Sënn och den Accès perenniséiere fir d'Journalisten an natierlech fir all déi Acteuren, déi en matière de blanchiment aktiv sinn.

An deem Sënn e ganz grouss Merci fir Är breet Ënnerstëtzung.

Plusieurs voix | Très bien!

M. Claude Wiseler, Président | Merci, Madamm Mi-nistesche. Domat wär dann d'Diskussioun zu dësem Projet de loi ofgeschloss.

Mir kommen zur Ofstëmmung iwwert de Projet de loi 7961. Den Text steet am Document parlementaire 7961²¹.

Vote sur l'ensemble du projet de loi 7961 et dispense du second vote constitutionnel

D'Ofstëmmen fänkt elo un. De Quorum ass erreecht. Vote par procuration. An de Vott ass ofgeschloss.

D'Resultat vum Vott ass: 60 Jo-Stëmmen, keng Nee-Stëmm, keng Abstentioun. Domat ass dëse Projet de loi dann eestëmmeg ugeholl.

Ont voté oui : Mmes Diane Aehm, Nancy Arendt épouse Kemp, MM. Maurice Bauer, Jeff Boonen, Alex Donnersbach, Emile Eicher, Félix Eischen (par M. Laurent Mosar), Paul Galles (par Mme Nathalie Morgenthaler), Mme Françoise Kemp, MM. Marc Lies, Ricardo Marques, Mmes Octavie Modert, Nathalie Morgenthaler, MM. Laurent Mosar, Jean-Paul Schaaf, Marc Spautz, Charles Weiler (par Mme Nancy Arendt épouse Kemp), Mme Stéphanie Weydert, MM. Claude Wiseler, Michel Wolter (par Mme Octavie Modert) et Laurent Zeimet ;

Mme Barbara Agostino, MM. Guy Arendt, André Bauler, Gilles Baum, Mmes Simone Beissel, Corinne Cahen, MM. Luc Emering, Fernand Etgen, Patrick Goldschmidt, Gusty Graas, Mmes Carole Hartmann, Mandy Minella, Lydie Polfer (par M. Gusty Graas) et M. Gérard Schockmel ;

M. Dan Biancalana, Mmes Taina Bofferding, Liz Braz, Francine Cloener, M. Yves Cruchten, Mme Claire Delcourt, MM. Mars Di Bartolomeo, Georges Engel, Franz Fayot, Claude Haagen, Mme Paulette Lenert (par M. Georges Engel) et M. Ben Polidori ;

MM. Jeff Engelen, Dan Hardy, Fred Keup, Mme Alexandra Schoos et M. Tom Weidig ;

Mme Djuna Bernard, M. Meris Sehovic, Mmes Sam Tanson et Joëlle Welfring ;

MM. Sven Clement et Marc Goergen ;

MM. Marc Baum (par M. David Wagner) et David Wagner.

Freet d'Chamber d'Dispens vum zweete Vote constitu-tionnel?

(Assentiment)

Dann ass dat esou decidéiert.

18. Dépôt d'une proposition de loi par M. Mars Di Bartolomeo

Elo hunn ech nach eng Ufro vum Här Mars Di Bartolomeo, dee wëllt eng Proposition de loi depo-séieren. Dann ass et un Iech, Här Di Bartolomeo.

(Brouhaha)

Mme Sam Tanson (déi gréng) | Elo si mer awer gespaant.

M. Sven Clement (Piraten) | ... eng rout Kaart!

(M. Mars Di Bartolomeo montre un carton rouge.)

(Hilarité)

M. Claude Wiseler, Président | Dir hutt 5 Minuten – just.

Exposé

M. Mars Di Bartolomeo (LSAP), auteur | Merci, Här President. Merci och fir d'Flexibilitéit. Eigentlech war geplangt, et de Mëtten zum Ufank vun der Sëtzung ze maachen. Also e grouss Merci.

Ech wollt eng Proposition de loi deponéieren, déi op dat reagiert, wat virun engem Mount hei iwwer en Appell vun der Croix-Rouge geschitt ass, fir dat an Zu-kunft ze verhënnere.

D'Croix-Rouge huet virun engem Mount en Appell un eis fräiwëlleg Blutspender gericht, fir Blut ze spenden, well d'Blutreserven e kriteschen Niveau erreicht hunn.

Lëtzebuerg zeechent sech duerch e Blutspendesys-tem aus, deen exemplaesch ass, well en op de Vo-lontariat opgebaut ass a mir kënnen op ronn 15.000 fräiwëlleg Blutspender zréckgräifen.

De Sënn vun dëser Proposition de loi ass et, änlech wéi an der Fonction publique, wéi am Gemengesec-teur, wéi an enger Rei vu Konventiounen, Kollektiv-verträge a fräiwëllegen Ofmaachungen zwëschent de Salarié vum verschiddene Betriber, fir dat ze verall-gemengere, nämlech, beim Akt vum Blutspenden e Congé spécial oder eng Fräistellung vu véier Stonnen ze gewärleeschten. Dat wäicht net vum Volontariat vum Blutspenden of, huet fir de Budget kee Käsch-tepunkt, mee kann awer e Käschtepunkt hu fir déi eenzel Betriber. An do ass et net verbueden, falls déi heite Proposition de loi sollt Realitéit ginn, driwwer ze diskutéieren, wien eng Hand mat upake kéint, fir déi zousätzlech Fraisen ze decken.

Do kann een zum Beispill un d'CNS denken, et kann een och un d'Mutualitéit vun den Entreprises den-ken. Mee wichteg ass et, dee System vum fräiwëllege Blutspenden ze pereniséieren. An dat hei ass ee Schrëtt. Et si jo weider Schrëtt ugekënnegt ginn. An ech wollt dofir dem President déi hei Proposition de loi iwwerreechen a Merci soe fir d'Flexibilitéit.

8471 – Proposition de loi portant modification de l'article L. 233-16 du Code du travail

M. Claude Wiseler, Président | Merci, Här Di Bartolomeo. Déi Proposition de loi geet dann an d'Conférence des Présidents.

19. 8381 – Projet de loi portant modification du Code de procédure pénale

An da komme mer zum nächste Punkt vun eise Ordre du jour, an zwar de Projet de loi 8381, eng Moderni-sation an Upassung vum Code de procédure pénale. Hei ass d'Riedezäit och nom Basismodell festgeluecht. De Rapporteur huet also 10 Minuten, déi eenzel Fra-k-tionen a Sensibilitéit 5 Minuten, d'Regierung 10 Minuten. Et hu sech schonn ageschriwwen: den Här Alex Donnersbach, d'Madamm Carole Hartmann, den Här Dan Biancalana, den Här Dan Hardy an d'Madamm Sam Tanson. An d'Wuert huet elo de Rapporteur vum Projet de loi, den honorabelen Här Alex Donnersbach. Här Donnersbach, Dir hutt d'Wuert.

Rapport de la Commission de la Justice

M. Alex Donnersbach (CSV), rapporteur | Merci, Här President. Also, dëse Projet de loi gouf effektiv den 8. Mee 2024 vun der Justizministesch deposiert a soll de Code de procédure pénale moderniséieren. D'Zil ass et, d'Lutte géint d'Kriminalitéit duerch nei Moosnamen an Adaptatiounen vun de Prozeduren ze verbesseren.

D'Pierre angulaire vun dësem Gesetzesprojet ass wierklech dat neit Kapitel am Code de procédure pé-nale fir d'Recherche active vun de Fugitifs. An da gouf et nach weider punktuell Verbesserungen vun der Pro-cédure pénale.

Fänke mer mat der Pierre angulaire vun dësem Ge-setzesprojet un: Dat ass, wéi gesot, d'Recherche active vun de Fugitiven. Do gi fir déi éischte Kéier strukturéiert Moosnamen agefeiert, déi et erlaben, d'Fugitiven aktiv ze fannen. Aktuell ass et nämlech esou, datt d'Lëtzebuurger Recht am Fong net kloer virgesinn huet, wéi déi Fugitiven aktiv apprehendé-iert kënnen ginn. Aktuell gëtt et verschidde Saachen: Den Artikel 332 a weiderer vum Code pénal luxem-bourgeois inkriminéiere verschidde Saachen, wéi zum Beispill d'Hëllef, wann ee fortleeft, awer net d'Flucht selwer.

Mat dësem Projet de loi gëtt dës Onkloerheet, dës juridique Onkloerheet, elo eliminéiert. An all déi ver-schidde Saache ginn elo kloer gereegelt, wann een aus dem Prisong fortleeft, wann ee sech net presentéiert, wann ee sech bei enger Surveillance électronique net un d'Reegelen hält, alles dat gëtt elo kloer gereegelt, fir datt d'Police hei kloer Moyenen huet. Contrairement zum franséische Recht, wou am Fong all d'Kompetenze beim Procureur sinn, bleiwe mer hei an der Kohärenz vum lëtzebuergesche System. Dat heescht, d'Kompe-tenze sinn opgedeelt ginn zwëschent dem Procureur d'État an dem Juge d'instruction: dem Procureur d'État op där enger Säit, dee kompetent ass fir d'Recherche vun de Fugitiven duerch d'Mandat oder duerch eng Enquête préliminaire, an op där anerer Säit de Juge d'instruction, dee spezifesch Moosnamen ordonéiert, wéi de Reperage an d'Lokalisatioun. Voilà. Dat bleift also an der Kohärenz vun eise System.

Da gi weider Artikelen ugepasst, notament den Ar-tikel 101-1. Do gëtt prezisiéiert, datt d'Police d'Recht huet, an en Doheem eranzegoen, wa si eng Person duerch e Mandat d'amener oder e Mandat d'arrêt sicht. Dat war bis haut e bëssen onkloer, soudatt d'Polizisten net woussten: Däerf ech elo an den Do-micile eran oder net? Déi heiten Dispositioun mécht dat elo ganz kloer, datt, wann esou e Mandat d'arrêt do ass, se dann och kënnen an den Domicile eragoen.

Da gëtt och den Artikel 179 ugepasst. Hei geet et am Fong drëm, den Delay vun dräi Deeg ofzeschaafe, an deem d'Jugen decidéiere kënnen, ob se an enger kol-legialer Formatioun tagen oder net. Dat ass am Fong